

法 相 畧 錄

梅 光 羲 居 士 著

上 海 佛 學 書 局 印 行

法相略錄

梅
鑑
編

三時教相

如來說教。隨機所宜。機有三品不同。教遂三時有別。諸異生類。無明所盲。起造惑業。迷執有我。於生死海。淪沒無依。故大悲尊。初成佛已。仙人鹿苑。轉四諦輪。說阿笈摩。除我有執。令小根等。漸登聖位。彼聞四諦。而斷我愚。尚於諸法。迷執實有。世尊爲除彼法有執。次於鷲嶺。說諸法空。所謂摩訶般若經等。令中根品。捨小趣大。彼聞世尊密義。意趣說無破有。便撥二諦性相。皆空爲無上理。由此二聖互執有空。迷謬競興。未契中道。如來爲除此空有執。於第三時。演了義教。解深密等會說一切法。唯有識等。心外法無破初有執。非無內識遺執。皆空離

有無邊。正處中道。於真諦理。悟證有方。於俗諦中。妙能留捨。如瑜伽論七十六。解深密經第三。廣說其相。爲對漸悟說教三時。若對頓悟無三時別。若對漸悟。卽有年月前後次第。若從所說未必如是。唯約義類相從。以爲三時而已。

五位百法

一心法。二心所有法。三色法。四心不相應行法。五無爲法。謂之五位。心法有八。心所有法有五十一。色法有十一。心不相應行有二十四。無爲有六。是其百法也。

八識大旨

識謂了別爲義。其數有八。故曰八識。謂一眼二耳三鼻四舌五身六意七末那八阿賴耶也。一眼識者。眼根爲所依。色境爲所緣。以生了別故名眼識。從所依而得名。乃至第六亦皆然焉。何等眼根。謂四大種所造眼識所依清淨色也。眼

者照了。能照色境。根者增上及出生爲義。爲增上緣能生眼識。故名爲根。乃至身根等亦準之。然眼等根非現量得。以能發識比知是有。斯乃以果知因。由用比體也。何等爲色。謂顯形表。又釋此三開爲三十一。謂開顯爲十三。青黃赤白。影光明闇。烟塵雲霧。空一顯色。開形爲十。長短方圓。麤細高下。若正若不正。開表爲八。取捨屈伸。行住坐臥也。四顯色實。餘色皆假。眼識所緣。唯是實境。不緣假境。二耳識者。耳根爲所依。聲境爲所緣。生了別用。故名耳識。何等耳根。謂四大種所造耳識所依清淨色也。耳者能聞。故名耳根。何等聲境。謂內聲外聲內外聲。可意聲不可意聲俱相違聲等也。響聲假。餘聲實。耳識緣實。不緣假境。三鼻識者。鼻根爲所依。香境爲所緣。而生了別。故名鼻識。所依淨色。謂之鼻根。能鼻爲鼻。香謂好香惡香平等香和合香變異香等也。四舌識者。舌根爲所依。味境爲所緣。生了別用。故名舌識。所依淨色。名曰舌根。能嘗爲義。除飢渴故。味謂

苦酢甘辛鹹淡。或可意。或不可意。或俱相違。或俱生。或和合。或變異。五身識者。身根爲所依。觸境爲所緣。以生了別。故名身識。所依淨色。謂之身根。身者積聚及依止義。諸根大造。並皆積聚。今此身根。爲彼多法。依止積集。所以獨得身根之名。觸謂能造大種。所造假觸。地水火風。謂之能造。堅勁爲地。流溼爲水。溫熱爲火。輕動爲風。所造觸者。謂滑性澀性。輕性重性等。所造是假。四大是實。以上五者。合名五識。種類相似。故總說之。如何相似。謂有五似。一謂俱依色根。二同緣色境。三俱但緣現在。四俱現量得。五俱有間斷。六意識者。謂依末那了別諸法。故名意識。末那翻意。卽是第七識之稱也。諸法。謂色法心法。有法無法等三世諸法也。分別此識。當有其四。謂明了意識。定中意識。獨散意識。夢中意識。初亦名曰五俱意識。後三總名獨頭意識。五俱意識。助五令起。亦令五識明了。取境定位意識。唯是現量。散位獨頭。通比非量。與五俱意。或唯現量。或通現比。及

非量攝。七末那識。謂依賴耶。緣彼見分。此翻云意。思量爲義。用彼爲性。及爲行相。恆審思量所執我相。恆言。簡前第六識。意識雖審思而非是恆有間斷故。次審思言。復簡第八。第八雖恆非審思故。恆審思量。雙簡五識。彼非恆起非審思故。此名何異第六意識。此持業釋。彼依主釋。八阿賴耶識。謂依末那緣於種子。有根身器界。何爲種子。謂本識中親生自果功能差別。此與本識及所生果不一不異。體用因果理應爾故。漏無漏種各有二類。一者本有。謂無始來異熟識中法爾而有生蘊處界功能差別。二始起。謂無始來數數現行熏習而有。諸有情無始時來有無漏種。不由熏習法爾成就。後勝進位熏令增長。無漏法起以此爲因。無漏起時復熏成種。有漏法種類此應知。無漏識緣無漏種子。有漏識緣有漏種子。有根身者。謂五色根及根依處。五根如向。根依處者。扶塵根也。器界。卽是色等五境內自種子爲其因緣。心內所變現行四大爲增上緣。造根境。

色。非是心外實大所造。問曰。且如色中形影假法。第八緣否。答曰。不緣假法。唯緣實境而已。阿賴耶。此翻曰藏。具有能藏所藏執藏義。故謂與雜染互爲緣故。有情執爲自內我故。能持染種。種名所藏此識是能藏。是雜染法所熏所依。染法名能藏此識爲所藏。爲染第七等所執藏以爲內我。名執藏義也。第七八識行相微細。內緣相續。無始已來。常無間斷者也。

六位心所

徧行有五。別境有五。善有十一。煩惱有六。隨煩惱有二十。不定有四。謂之六位。五十一心所也。徧行五者。一作意。謂能警心爲性。於所緣境引心爲業。謂此警覺應起心種。引令趣境。故名作意。雖此亦能引心。所心是主故。但說引心。二觸。謂三和分別變異令心心所觸境爲性。受想思等所依爲業。謂根境識更相隨順。故名三和。觸依彼生。令彼和合。故說爲彼。三和合位皆有順生心所功能。說

名變異。觸似彼起故名分別。三受。謂領納順違俱非境相爲性。起愛爲業。能起合離非二欲故。四想。謂於境取像爲性。施設種種名言爲業。言施設者。安立之異名。此中安立。取像異名。謂此是青非青等。作此分齊而取共相。名爲安立。由取此像便起名言。此是青等。性類衆多。故名種種。五思。謂令心造作爲性。於善品等役心爲業。善等之因。卽善惡境。由了此境相故。思作諸業。起善惡等事。亦令心所造作。以心勝故。但說作心。問。何故此五名徧行耶。答。一切心中定可得故。此五心所具四一切。謂一切性及地時俱。一切性者。三性之處。皆得起故。一切地者。有尋等三地皆有故。一切時者。或一切有心皆有。或無始不斷。或緣一切境。故總言時。一切俱者。定俱生故。別境五者。一欲。謂於所樂境希望爲性。勤依爲業。所樂謂欲觀境。於一切事欲觀察者。有希望故。若不欲觀。隨因境勢任運緣者。卽全無欲。二勝解。謂於決定境印持爲性。不可引轉爲業。謂邪正等。

教理證力於所取境審決印持。由此異緣不能引轉。三念。謂於曾受境令心明記。不忘爲性。定依爲業。謂數憶持曾所受境令不忘失。能引定故。四定。謂於所觀境令心專注不散爲性。智依爲業。謂觀德失俱非境中。由定令專注不散。依斯便有決擇智生。心專注言。顯所欲住卽能住。非唯一境。不爾。見道歷觀諸諦。前後境別應無等持。五慧。謂於所觀境簡擇爲性。斷疑爲業。謂觀得失俱非境中。由慧推求得決定故。問。此五何故名別境耶。答。緣別別境而得生故。問。定慧同轉一境。何云別境。答。所緣境事多分不同。故從多分名曰別境矣。此五唯有初二一切。不緣一切境。亦非相續。非心有卽有。故無時也。又此未必並生。故無俱焉。善十一者。一信。謂於實德能深忍樂欲。心淨爲性。對治不信。樂善爲業。然信差別略有三種。一信實有。謂於諸法實事理中深信忍故。二信有德。謂於三寶眞淨德中深信樂故。三信有能。謂於一切世出世善深信有力。能得能成。起

希望故。由斯對治不信彼心。愛樂證修世出世善。此性澄清能淨心等。以心勝故。立心淨名。二精進。謂於善惡品修斷事。勇悍爲性。對治懈怠。滿善爲業。勇謂升進。悍謂堅牢。勇表精進。簡諸染法。悍表精純。簡淨無記。卽顯精進唯善性攝。三慚。謂依自法力崇重賢善爲性。對治無慚。止息惡行爲業。若亦依於周孔之書。皆名貴法世禮儀故。四愧。謂依世間力。輕拒暴惡爲性。對治無愧。止息惡行爲業。有惡者名暴。染法體名惡。輕有惡者而不親。拒惡法業而不作。五無貪。謂於有有具無著爲性。對治貪著。作善爲業。三有曰有三有之因。謂之有具。六無瞋。謂於苦苦具無恚爲性。對治瞋恚。作善爲業。苦謂三苦苦具。卽彼能生苦者。一切皆是。七無癡。謂於諸理事明解爲性。對治愚癡。作善爲業。八輕安。謂遠離麤重。調暢身心。堪任爲性。對治惛沈。轉依爲業。離重名輕。調暢名安。令所依身轉去麤重。得安隱故。若無漏者。除有漏麤重。是通三性。若有漏者。除煩惱麤重。

唯是染性。九不放逸。謂精進三根。於所斷修。防修爲性。對治放逸。成滿一切世出世間善事爲業。非別有體。無異相故。離四功能。無別用故。十行捨。謂精進三根。令心平等正直。無功用住爲性。對治掉舉。靜住爲業。此無別體。離彼四法無相用故。離沉沒等。初心平等遠離加行。次心正直。於染無怯。後無功用。據實而論。初中後各有三。且依增上說。初中後行。謂行蘊。簡受蘊捨故。置行言。十一不害。謂於諸有情。不爲損惱爲性。能對治害。悲愍爲業。謂卽無瞋。於有情所不爲損惱。假名不害。若夫無瞋。實有自體。不害依彼一分假立。無瞋翻對斷物命瞋。不害正違損惱物害。無瞋與樂。不害拔苦。是謂此二麤相差別。爲顯慈悲二相別故。利樂有情。彼二勝故。此之十一名曰善者。唯善心中可得生故。善唯有一。謂一切地。十徧善心。輕安不徧。要在定位。方有輕安。調暢身心。餘位無故。非一切俱非。一切性及一切時。其義易知。煩惱六者。一貪。謂於有有具染着爲性。能

障無貪。生苦爲業。謂由愛力取蘊生故。二瞋。謂於苦苦具憎恚爲性。能障無瞋。不安隱性。惡行所依爲業。謂瞋必令身心熱惱起諸惡業不善性故。三癡。謂於諸理事迷闇爲性。能障無癡。一切雜染所依爲業。謂由無明起疑邪見貪等煩惱業。能招後生雜染法故。四慢。謂恃已於他高舉爲性。能障不慢。生苦爲業。謂若有慢於德有德心不謙下。由此生死輪轉無窮受諸苦故。五疑。謂於諸諦理猶豫爲性。能障不疑善品爲業。謂猶豫者善不生故。六惡見。謂於諸諦理顛倒推度。染慧爲性。能障善見。招苦爲業。謂惡見者多受苦故。分此爲五。一薩迦耶見。謂於五取蘊執我我所。一切見趣所依爲業。二邊執見。謂卽於彼隨執斷常。障處中行出離爲業。三邪見。謂謗因果作用實事。及非四見諸餘邪執。謗因者。謂無施與。無愛樂。無祠祀。無妙行。無惡行等。謗果者。謂無妙行及惡行業所招。異熟謗作用者。無此世間。無彼世間。無母無父。無化生有情等。謗實事者。謂無。

世間真阿羅漢等。四見取見。謂於諸見及所依蘊。執爲最勝。能得清淨。一切鬪
 諍所依爲業。五戒禁取。謂於隨順諸見戒禁。及所依蘊。執爲最勝。能得清淨。無
 利勤苦所依爲業。今此五見名爲惡者。毀譽之名。實有覆故。此十煩惱體性根
 本能生諸惑。故名本惑。煩是擾義。惱是亂義。擾亂有情。故名煩惱。隨惑二十者。
 一忿。謂依對現前不饒益境。憤發爲性。能障不忿。執杖爲業。謂懷忿者。多發暴
 惡。身表業故。此卽瞋恚。一分爲體。離瞋無別忿相用故。二恨。謂由忿爲先。懷惡
 不捨。結怨爲性。能障不恨。熱惱爲業。謂結恨者。不能含忍。恆熱惱故。此亦瞋恚
 一分爲體。三惱。謂忿恨爲先。迫觸暴熱。狠戾爲性。能障不惱。蛆螫爲業。謂追往
 惡。觸現違緣。心便狠戾。多發囂暴。凶鄙麤言。蛆螫他故。此亦瞋恚。一分爲體。四
 覆。謂於自作罪。恐失利譽。隱藏爲性。能障不覆。悔惱爲業。謂覆罪者。後必悔惱。
 不安隱故。此覆貪癡。一分所攝。不懼當苦。覆自罪者。癡之所攝。恐失利譽。覆自

罪者。貪之所攝。五誑。謂爲獲利譽。矯現有德。詭詐爲性。能障不誑。邪命爲業。此卽貪癡一分爲體。離二無別誑相用故。六詔。謂爲網他故。矯設異儀。險曲爲性。能障不詔。教誨爲業。險者不實之名。曲者不直之義。此亦貪癡一分爲體。離二無別詔相用故。貪名利故。詔是貪分。無智故。詔卽是癡分。七憍。謂於自盛事。深生染著。醉傲爲性。能障不憍。染依爲業。諸所知法。亦名盛事。醉者昏迷異名也。此亦貪愛一分爲體。離貪無別憍相用故。八害。謂於諸有情。心無悲愍。損惱爲性。能障不害。逼惱爲業。謂有害者。逼惱他故。此亦瞋恚一分爲體。離瞋無別害相用故。九嫉。謂殉自名利。不耐他榮。妒忌爲性。能障不嫉。憂感爲業。此亦瞋恚一分爲體。離瞋無別嫉相用故。十慳。謂耽著財法。不能惠施。祕慳爲性。能障不慳。鄙畜爲業。資具妻子榮位等事。皆名爲財。理教行果。皆名爲法。此卽貪愛一分爲體。離貪無別慳相用故。十一無慚。謂不顧自法。輕拒賢善爲性。能障礙慚。

生長惡行爲業。十二無愧。謂不顧世間。崇重暴惡爲性。能障礙愧。生長惡行爲業。十三不信。謂於實德能。不忍樂欲。心穢爲性。能障淨信。惰依爲業。謂諸染法各有別相。唯此不信。自相渾濁。復能渾濁餘心心所。十四懈怠。謂於善惡品。修斷事中。懶惰爲性。能障精進。增染爲業。於諸染事而策勤者。亦名懈怠。退善法故。於無記事而策勤者。於諸善品無進退故。是欲勝解。非別有性。十五放逸。謂於染淨品。不能防修。縱蕩爲性。障不放逸。增惡損善所依爲業。謂由懈怠及貪瞋癡。不能防修染淨品法。總名放逸。非別有體。十六惛沉。謂令心於境無堪任爲性。能障輕安（毗鉢舍那）爲業。別有自性。惛沉別相。謂即夢重。令俱生法無堪任故。十七掉舉。爲令心於境。不寂靜爲性。能障行捨奢摩他爲業。別有自性。掉舉別相。謂即囂動。令俱生法不寂靜故。十八失念。謂於所緣境。不能明記爲性。能障正念。散亂所依爲業。以念與癡之各一分爲此心所。別無自性。十九

不正知。謂於所觀境。謬解爲性。能障正知。毀犯爲業。非迷於境而闇鈍也。但是錯謬邪解。名不正知。以慧一分及癡一分而爲此體。別無自性。二十散亂。謂於諸所緣。令心流蕩爲性。能障正定。惡慧所依爲業。別有自體。散亂別相。謂躁擾令俱生法。皆流蕩故。掉舉散亂二用何別。彼令易解。此令易緣。雖一刹那解緣無易。而於相續有易義故。此等二十何曰隨惑。謂是煩惱等流性故。是非前後等流之義。同類所引謂之等流。分此二十以爲三類。謂忿等十各別起。故名小隨煩惱。無慚等二徧不善故。名中隨煩惱。掉舉等八徧染心故。名大隨煩惱。小十大三。定是假有。無慚無愧。不信懈怠。掉舉昏沉。散亂七種。定是實有。不定四者。一悔。謂惡作。惡所作業。追悔爲性。障止爲業。此卽於果。假立因名。以名惡作。先惡所作業後方追悔。故悔先不作亦惡作攝。二睡眠。謂令不自在。昧略爲性。障觀爲業。謂睡眠位。身不自在。心極闇劣。一門轉故。昧簡在定。略別寤時。令顯。

睡眠非無體用。有無心位假立此名。三尋四伺。尋謂尋求。令心忽遽於意言境。麤轉爲性。伺謂伺察。令心忽遽於意言境。細轉爲性。此二俱以安不安住身心分位所依爲業。第六意識名曰意言。意識所緣名意言境。心所之境亦麤細轉。而意是主勝故偏說。今此境者。通一切境。此二心所俱依外門緣外境生麤細發言多依身語而轉故也。並用思慧一分爲體。若離思慧別無自性。此四心所於善染等皆不定故。非如觸等定徧心故。非如欲等定徧地故。立不定名。

十一色法

色法有十一。謂眼耳鼻舌身色聲香味觸及法處所攝色也。何名法處所攝色。此有五種。謂極略色。極迴色。受所引色。徧計所起色。自在所生色也。極略色者。卽五色根。五色境及四大種。法處實色。極微爲性。顯揚第五。瑜伽五十四。說建立極微有十五種。謂眼等根爲五極微。色等境五極微。四大種四極微。法處實